

# PAULO ENA URIURI TITO ENANA

---

**Hari dubu hari dubu, itaitawataidi eo woewoeaidi lauheatana.**

**1** <sup>1</sup>Paulo, Eaubada ena heaheari tauna, eo Iesu Keriso ena aposotolo, Eaubada ena hinehineri tataodi edi sunuma bena ea sagulaei, eo mamohoina edi itaitalobaina hinage, arinai Eaubada ta nanabuei, <sup>2</sup>mauri i lau e nige nosina ta sunsunumaei wa, doha Eaubada ia taba nige i boraida, ia ede i ribahesunumaedao, mumuga eai i laoma ina; <sup>3</sup>abotai, iabom ena huia eai, ena riba i hemasaraha, iaede se leama eau bena tauhemasarahana, doha Eaubada Tauhemauida i lauhesomgu ta;

<sup>4</sup>Tito enam ina, natugu mamohoi e, eda sunuma esegana ede:

Ainauia eo loni enam, Eaubada arinai i laoma, eo Keriso Iesu Tauhemauida hinage.

<sup>5</sup>Kerete eai ea laugabaem paana ede ina, ginauri headi metai se abihedehe, oa bena u heduduraidi, eo babadayao bena u tauribaedi, hari eanua hari eanua eai, doha am paisoa ea hetorom; <sup>6</sup>aitea tau nige edi aba-hegiruna, sine esega mo monena, nanatunayao hinage se awaabi eo taba nige se hegirudi si ene se hemanabara e se miamia gaibu. <sup>7</sup>Paana Tau-woewoea tabu edi aba-hegiruna, ia Eaubada ena ginauri tauhepahepasoaina, bena nige i tanuagauioi, nige i ouyalayala heula, nige taunomnomdaoi, nige i aiaipidiri, taba nige moni biibiina arinai se hegadolesa. <sup>8</sup>Na ena laulau mo tatao i haihitalaidi, ia abilolo taugadosisiena, eo iabom ena gadosisi abina i ata i tanugaedi, ena abi se dudurai, tau tabuna, miamia lolo taunanabuena. <sup>9</sup>Riba mamohoina se heatada wa i sogohididini, arinai abo abina i ata lauheata mamohoi i laulauheata, eo ena riba tauheuiu edi riba i hemaisadi to se italobai. <sup>10</sup>Paana tauawayagara se gamagari, tauribariba gaibu, tauboraborasom, tauperitome pelena wa boeana eai se gamagari ariri; <sup>11</sup>beni ta oihemonoudi, isi numa headi taumiadi maudoidi se heasibuidi, ginauri nige i lolo se ribaribaedi iaede se laulauheata, moni biibiina debana

eai. <sup>12</sup>Doha isi edi eanua tauna i ribaei, isibom edi peroveta wa, ena riba i ene, “Kerete tataodi kamanidi se boraborasom, sarai baaedi isi, se miamia gaibu, se aiaisom.” <sup>13</sup>Ina riba sanapu ta mamohoi. Arinai u ribasuuidi, u riba adidiri, bena sunuma ta se abi-mamohoiei, <sup>14</sup>tabu Iudea edi pipiridae se ataatai-lau aridi eai, e tatao dobila mamohoi se tausuaaeyao edi riba-hesom se awaabiedi. <sup>15</sup>Tau-nuaaa arinai ginauri gamagaridi se aa mo, na tatao nuadi se hebiidio, eo nige se awaawamamohoi, isi matadi eai nige ginauri esau i aa; nuadi eo nuatu aba-heduduraina nuaboeadi eai, se bii gogo. <sup>16</sup>Edi riba si ene Eaubada abina se ata, na edi paipaisoa eai ia se harerei; isi taukabakabaleadi, tauawayagara, nige gonoadi paisoa lolona esau se ginauri.

**Lauheata: Eaubada ena pele suina eo woeaina.**

**2** <sup>1</sup>Na oa mo ginauri saha eo saha se patulau lauheata mamohoina arinai, te-meta abo u ribaribaedi. <sup>2</sup>Tautaubada bena se mia komakomani, se italobai, nuadi se taru, sunuma eo gadosisi eo taubiga se abimaodaidi. <sup>3</sup>Sinesinebada hinage doha, bena edi laulau eai se heaheasisi, nige dodoga se hebahebaeadi edi gigimasi eai, nige nomnom-waina i auaudi; na saha i lolo mo, iaede bena se laulauheataei, <sup>4</sup>abo isimurimurita sisinedi se heata komakomanidi bena monediyao se gadosisiedi eo nanatudiyao se gadosisiedi. <sup>5</sup>Bena se sibasiba, tau-miamia aa, isibom edi numa-alo eai se paipaisoa, edi abi se lolo, isibom monediyao se awaabiedi, arinai Eaubada ena riba bena tabu tatao edi aba-ribabaaeaina. <sup>6</sup>Hinage doha, tatao hewahewari u lauhasahasaidi bena isi nuadi se tanugaedi. <sup>7</sup>Ginauri gamagaridi eai oa iillam eo em paipaisoa lolodi bena i hemala edi tautau; em lauheata eai abi mamohoi eo nuatu duduraina eai u hemasarahauioim, <sup>8</sup>em ribariba se lolo arinai taba nige se hepilipilidi, arinai ena esau bena i tauguduim abo i taumaeamaea, nige aba-ribabaaeaida esau i lobai. <sup>9</sup>Tauauau tataodi u lauhasahasaidi bena ginauri gamagaridi aridi eai tanuagadiyao se awaabiedi eo nuadi se helolodi, eo tabu se oiopili. <sup>10</sup>Tabu edi ginauri se abi gaibuidi, na adi paisoa lolodi debadi eai abo tanuagadiyao se sunumaedi, eo Eaubada Tauhemaurida lauheatana abo se mia helolo. <sup>11</sup>Paana Eaubada ena ainuaia i taumasarahao, tatao gamagaridi edi mauri i leama, <sup>12</sup>i heatada bena Eaubada mia-murimuriena, eo tanoubu ta gadosisina, nuada eai ta aiduiedi, na ina huia ta ta mia komakomani, ta mia dudurai, Eaubada ta nanabuei tanoubu eai ta. <sup>13</sup>Sunuma nua woiwainana wa, iaede eda Eaubada lailaina, Tauhemaurida Iesu Keriso, ana tepo namanamarina abo i taumasaraha, ede ta bagibagiei. <sup>14</sup>Ia i moseuioi ita debada eai, bena baaea gamagamagari aridi eai i unehaida, i heada iabom enana, iabom ena tataoyao mamohoi, iabom ana gogo, ita wa paisoa lolodi aridi eai taunuahai.

<sup>15</sup>Ginauri ta u lauhasahasaidi, u ribasuu, u riba doha tanuaga ena ribariba. Tabu tau esau i nuatuhegagirim.

**3** <sup>1</sup>Nuadi u hesae, basileia tanuagadi eo aidobudi emi tanutanuaga, se awaabiedi. Se nonoha paisoa lolo gamagaridi aridi eai bena se soasoari, <sup>2</sup>tabu tau esau se ribabaaeai, tabu se haihaiawayagara, na se taubiga mo, edi manabiga abo i masaraha tatao gamagaridi aridi eai. <sup>3</sup>Paana ita hinage nabada wa ribada se walolo, ta awayagara hinage, se woea-ponorida, hari gadosisi eo aba-kode udoi udoi ta heayaiedi, nua-ealayala boeana eai ta mimia eo aiaromagigiri, se hewaiunueda ita hinage tauhewahewaiunu. <sup>4</sup>Na Guiau Tauhemaurida ena taubiga, eo ena gadosisi abiabilolona i masaraha eo ta ita, <sup>5</sup>i tua-hemaurida wa, nige ita eda paipaisoa e eda laulau dudurai debadi eai, na ia ena nuatoatoa debana eai mo, se labauioida wa deuri-heaana eai, eo heharihariu Earua Tabuna boeana eai, <sup>6</sup>iaede i hegoi-auri potada eai, ta abi-helai Tauhemaurida Iesu Keriso debana eai; <sup>7</sup>ena ainuia debana eai se heduduraidao, ta hemala ena gogo taubina, iaede eda sunusunuma mauri nige nosina. <sup>8</sup>Riba mia-tahitahina ina.

Ea henua riba ta u riba-headidiri, arinai abo Eaubada tauataiena se komani se moseuioidi paisoa lolodi se laelaedi. Ginauri ta se lolo, tatao aba-saguidi ede. <sup>9</sup>Na hesio eauyaure si otawa, eo isi-baguna esadi leledi, eo haisaesae, eo laugagaeo ribadi haiawayagaradi: meta nige tatao aba-saguidi, nige aniodi. <sup>10</sup>Aitea tau lauheata borabora i hetubu, ma-esega, ma-labui u ribahesanapuei, murina eai tau doha ina besi, u laugabaei. <sup>11</sup>U nuatui ena laulau se gewagewa, baaea i ginaginauri, iabom ribahematena i ribaeuioi.

<sup>12</sup>Sora ena Aretema ea hetamariyawa, e Taikika, abo u aipate adidiri u laoma arigu eai Nikapoli eai; nuagu i adidiri bena huia gogoma eau nei eai abo ea mia. <sup>13</sup>U aipate hinage Senasi, laugagaeo-tauna, eo Apolo, u hegeru komakomanidi ena se torohai edi adau eai; tabu ginauri esau se deha. <sup>14</sup>Eda tataoyao bena abina se ata se paisoa lolo, abo gonoadi porohe udoi udoi se baheidi, ma-uauadi eai se laulau.

<sup>15</sup>Isi gamagaridi wau-ta maeguyao ina se lautoiem. Metai hinage taugadosisiemai sunuma boeana eai ta, enamai u lautoiedi.

Ainauiana i mia-taunimiu, omi gamagarimiu. Amen.<sup>a</sup>

---

**a 3.15** Nikapoli, Makedonia eai, se uri Tito enana. Ia se hetoro Tau-woeawoea bagubagunana ekalesia Kerete eai i itawataidi.